

- वित्त मंत्री निर्मला सीतारमण माली हलका अर पूंजी बाजार ऊं जुड़्या लोगां सागे बजट ऊं पैली री चर्चा कीनी— राज्य सरकार ई प्रदेश रा बजट सारु जनता ऊं राय मांगी।
- कोटा-बूंदी हलका मांय सुपोषित मां अभियान रो तीजो दौर काल सुरु व्हेला।
- राष्ट्रीय खेल पुरस्कारां रो ऐलाण करी ज्यो — राजस्थान री पैरा निशानेबाज मोना अग्रवाल ने अर्जुन पुरस्कार ऊं नवाजी जावेला।
- प्रदेश मांय ज़ोरदार ठारी ऊं जिन्दगी माथे असर पड़्यो—आवता दिनां पारो 2 ऊं 3 डिग्री सेल्सियस चढ़बा रा आसार।

000

केंद्रीय वित्त मंत्री निर्मला सीतारमण आज माली साल 2025-26 रा बजट रा बारा मांय माली हलका अर पूंजी बाजार रा हितधारकां सागे बजट ऊं पैली मीटिंग कीनी। माली साल 2025-26 रो केंद्रीय बजट ई साल एक फरवरी ने संसद मांय पेश कर्या जावण रा आसार है। प्रदेश रा बजट सारु ई जनता ऊं राय मांगी ज्यी है। मुख्यमंत्री भजनलाल शर्मा एक सोशल मीडिया पोस्ट रे मार्फत जनता ऊं राय देवण री अपील कीनी है। राय 10 जनवरी ताई फाइनैस डॉट राजस्थान डॉट जीओवी डॉट आईएन माथे भेजी जा सके है। ई सागे ई क्यूआर कोड स्कैन कर र ई राय दी जा सके है।

000

आस वाळी लुगाइयां ने पोषण अर स्वास्थ्य ऊं जुड़ी हिफाजत मुहैया करावण रा मकसद ऊं लोकसभा अध्यक्ष ओम बिरला री पहल ऊं चलाया जा रह्या सुपोषित मां अभियान रो तीजो दौर काल सुरु व्हेला। म्हाणा कोटा खबरनवीस बतायो के अभियान रा तैत जरूरतमंद पिरवारां री आस वाळी डोढ़ हजार महिलावां री पिछाण करी ज्यी है।

000

लोकसभा अध्यक्ष ओम बिरला आज कोटा मांय एमबीएस अर जेके लोन अस्पताल रो दौरा कर र व्यवस्थावां रो जायजो लीनो अर अहलकारां ने ज़रूरी हुकम दीना। वे मरीजां रा सुबीता मुजब अस्पताल रो नुवो प्लान बणावण बाबत् ई कह्यो।

000

राज्यपाल हरिभाऊ बागडे नौजवानां ऊं विकसित भारत रा संकल्प ने पूरा करण मांय भागीदारी निभावण री अपील कीनी है। वे आज महाराष्ट्र रा लातूर मांय अखिल भारतीय विद्यार्थी परिषद-एबीवीपी रा 59वां देवगिरी राज्य सम्मेलन मांय बोल रह्या हा। वे कह्यो के नौजवान खुद रा काम धंधा रे जरिये देश रा विकास मांय योगदान दे सके है। श्री बागडे कह्यो के एबीवीपी ने 'राष्ट्र प्रथम' री भावना सागे देश रा विकास मांय न्यारा-न्यारा हलकां मांय नौजवानां ने जोड़बा री पहल करणी चाहिजे।

000

राज्य मांय परवाह थीम माथे मनाया जा रह्या सड़क सुरक्षा महीना रा तैत भांत-भांत रा कार्सकम राख्या जा रह्या है। भरतपुर मांय गाड़ियां चलावण वाळां ने वाहन चलाती बगत सावचेती राखण री राय दीरीजी। स्कूटर-मोटर साइकिल चलावण वाळां ऊं हेलमेट लगावण अर कारां-जीपां चलावण वाळां ने गुलाब रा फूल दे र सीट बेल्ट लगावण री अपील करी ज्यी। इण ऊं पैली मोटरसाइकिल रैली निकाळ र यातायात नियमां री पूरी पालना करण रो संदेश दियो ज्यो। करौली ज़िला रा श्री महावीर जी रा थानाधिकारी कैलाश सामरी कविता रे मार्फत हेलमेट लगावण री अपील कीनी। झालावाड़ मांय पुलिस अर ज़िला प्रशासन, परिवहन विभाग अर जनता री मदद ऊं 303 हेलमेट बांटी ज्यी।

नागौर मांय जिला कलेक्टर अरुण कुमार पुरोहित जागरूकता रैली ने हरी झंडी बता र रवाना कीनी। जैसलमेर जिला मांय पोकरण रा सरकारी कॉलेज मांय पी0पी0टी0 रे मार्फत सड़क सुरक्षा जागरूकता प्रजेन्टेशन दियो ज्यो अर सड़क सुरक्षा प्रश्नोत्तरी होड़ राख्यी ज्यी।

000

केन्द्र सरकार राष्ट्रीय खेल पुरस्कार ऊं नवाज़ा जावण वाळां रा नाम रो ऐलाण कर दीनो है। विश्व शतरंज चैंपियन डी. गुकेश, पेरिस ओलिंपिक खेलां मांय दो तमगा जीतण वाळा निशानेबाज़ मनु भाकर, भारत री हॉकी टीम रा कप्तान हरमनप्रीत सिंह अर पेरिस पैरालिंपिक खेलां री एथलेटिक्स होड़ मांय सोना रो तमगो जीतण वाळा प्रवीण कुमार ने मेजर ध्यानचंद खेल रत्न पुरस्कार ऊं नवाज़ा जावेला। आं सागे ई राजस्थान री पैरा निशानेबाज़ मोना अग्रवाल समेत 32 खिलाड़ियां रो अर्जुन पुरस्कार अर न्यारा-न्यारा खेलां री सिखावण देवण वाळा पांच कोच रो द्रोणाचार्य पुरस्कार दे र मान कर्यो जावेला। मोना अग्रवाल 2024 रा पैरालिम्पिक मांय आर-2 महिला वर्ग री दस मीटर एयर राइफल एसएच-1 होड़ मांय कांसा रो तमगो जीत्यो हो। राष्ट्रपति द्रौपदी मुर्मू 17 जनवरी ने राष्ट्रपति भवन मांय राख्या जावण वाळा जळसा मांय अ पुरस्कार देवेला।

000

प्रदेश मांय बाज रह्या सीळा बायरा ऊं गळन बध ग्यी है। राज्य रा केई जिलां मांय आज संवारे ई घणी धुंअर रही, ज्यी कारण आवण— जावण माथे असर पड़्यो। लारली रात सब ऊं कम 3 दशमलव 6 डिग्री सेल्सियस तापमान सीकर जिला रा फतेहपुर मांय दर्ज करी ज्यो। मौसम केन्द्र जयपुर रा निदेशक राधेश्याम शर्मा बतायो के आवता दिनां पारो 2 ऊं 3 डिग्री सेल्सियस तांई चढ़बा रा आसार है।

ई बीचे, पालो पड़बा री शंका ने ध्यान राखता थकां किसानां सारू एडवाइजरी जारी करी ज्यी है। भीलवाड़ा मांय कृषि विभाग रा संयुक्त निदेशक विनोद जैन काश्तकारां ने साखां ने पाला ऊं बचावण सारू सल्फ्यूरिक एसिड रा घोल रो छिड़काव करण री राय दीनी है।

000

प्रदेश मांय पड़ रही तेज़ ठण्ड ने ध्यान राखता थकां आंगनबाड़ी केन्द्रां रा बगत मांय बदलाव करण या हालात रे मुजब छुट्टी रो ऐलाण करण रा हक संबंधित जिलां रा जिला कलेक्टर ने दिया ज्यो है। महिला अर बाल विकास विभाग रा शासन सचिव महेन्द्र सोनी आ जाणकारी दीनी। वे 3 ऊं 6 साल तांई उम्र रा बच्चां ने दिया जावण वाळा नाश्ता अर गरम पूरक पोषाहार ने छुट्टी रा दिनां मांय टेक होम राशन रा तौर ऊं मुहैया करावण रा हुकम ई दीना।

000

सरिस्का अभ्यारण्य ऊं आयो बाघ आज अलवर जिला रा करणपुरा गांव मांय निजर आयो। ओ बाघ दौसा जिला रा बावड़ीखेड़ा अर करिरीया व्हेतो थको अलवर जिला रा पीपलहेड़ा अर करणपुरा गांवां मांय पूग ग्यो। दौसा रा जिला वन अधिकारी केतन कुमार बतायो के ओ बाघ काल दौसा जिला रा महुखेड़ा गांव मांय निजर आयो हो, ज्यी पाछे इण ने पकड़बा री कोशिशां करी जा रही है।

000

अजमेर मांय ख्वाजा साहब रो 813 वों सालाना उर्स औपचारिक तौर ऊं आज सरु व्हे ग्यो। उर्स मांय सिरकत करण सारु देश-परदेश ऊं जायरीन अजमेर पूग रह्या है। आज केन्द्रीय मंत्री चिराग पासवान री ओर ऊं चादर पेश करी ज्यी। प्रधानमंत्री नरेन्द्र मोदी री ओर ऊं चार जनवरी ने संसदीय कार्य मंत्री किरें रिजिजू चादर चढ़ावेला। रिजिजू रो इण ई दिन दरगाह रा वेब पोर्टल अर गरीब नवाज़ एप री शुरूआत करण रो कार्यक्रम है। उर्स मांय आवण वाळा जायरीन री मोटी तादाद अर अकीदतमंदां रा सुबीता ने ध्यान राखता थकां जिला प्रशासन अर पुलिस हिफाज़त रा पुख्ता बंदोबस्त कीना है।

000

राज्य मांय लगाया जा रह्या मुख्यमंत्री आयुष्मान आरोग्य शिविरां रो जनता ने फ़ायदो मिल रह्यो है। बाड़मेर जिला मांय हाल ताईं लगायी ज्या 71 शिविरां रे ज़रिए 21 हजार जणां ने फ़ायदो दियो ज्यो है। मुख्य चिकित्सा एवं स्वास्थ्य अधिकारी डॉक्टर संजीव मित्तल बतायो के काल फागलिया रा सामुदायिक स्वास्थ्य केन्द्र मांय मुख्यमंत्री आयुष्मान आरोग्य शिविर लगायो जावेला।

000

पाली ज़िला री हेमावास ग्राम पंचायत रा रामासिया मांय राजकीय उच्च प्राथमिक विद्यालय मांय टीन शेड अर सड़कां अर नाळियां बणावण रा काम रो कैबिनेट मंत्री जोराराम कुमावत उद्घाटन कीनो। ई मौके वे राज्य सरकार री जनता रा भला सारु चलायी जा रही भांत-भांत री योजनावां री जाणकारी दीनी। कैबिनेट मंत्री कुमावत भांगेसर मांय ई आयुष्मान आरोग्य मंदिर, उपस्वास्थ्य केन्द्र अर विकास रा दूजा कामां रो उद्घाटन कीनो।

000

पाली मांय जिला कलेक्टर एलएन मंत्री कीरवा अर रानी ग्राम पंचायत मांय जनसुणवाई कर र अहलकारां ने जनता री परेशानियां बेगी निपटावण रा हुकम दीना। अलवर मांय जिला कलेक्टर डॉ. आर्तिका शुक्ला थानागाजी रा उपखण्ड कार्यालय मांय जनसुणवाई कीनी। हनुमानगढ़ रा जिला कलेक्टर काना राम पीलीबंगा पंचायत समिति री खोथावाली ग्राम पंचायत मांय जनसुणवाई कीनी। ई मौके वे अहलकारां ऊं पंचायत मांय पीवण रा पाणी री व्यवस्था अर जलजीवन मिशन रा तैत कर्या जा रह्या कामां रा बारा मांय जाणकारी ई लीनी।

000

10वीं अखिल भारतीय हॉकी होड़ आज केकड़ी मांय सरु व्ही। होड़ मांय देश भर री 28 टीमां सिरकत कर रही है। उद्घाटन मैच मांय उज्जैन री टीम अवध री टीम ने 5-3 ऊं शिकस्त दीनी।

000